

壬癸志稿八

太倉錢寶琛伯瑜輯

同里

葉裕仁涵溪  
季錫疇菘耘  
趙兆熊耳山  
畢庭杰雄伯

參校

人物

太倉州

義行

元

吳貴字和卿淮西安豐人以忠武校尉宜興管軍上百戶因居太倉性剛直抑強扶弱好義出於天性至順二年歲大荒疫遺棄滿道浮屍塞河貴悉收錄存養且捐

壬癸志稿

義行

一

貲募人撈屍數千就西關外葬之

何敬德上海人居太倉事張瑄行舶司管鑰贏不自私恆勸瑄父子毋嗜進毋厚藏以速禍瑄不能用遂棄去時同輩皆佩金虎符意氣自得敬德布衣蔬食積貲惟濟貧者杭州大饑卽佛寺煮糜半年掩骼數萬財盡而卒

陳寶生字彥廉孫天富字維善皆由泉州居太倉勇於為義寶生父思恭賈海而死天富憫其幼孤約為兄弟共出貨泉復謀貿易於海外諸國迭畱養母或相輔而往彼此不稽子本無毫髮私所涉無慮數十國皆能以

孝友信義化導其人外國稱泉州兩義士高啟有長歌紀其事

明

陳蒙字允德博學攻詩賦不求倖進嘗以千金授僕名太平者貿易太平捐貲結納隨靖難有功授山西行都司高山衛指揮使太平卒無嗣移檄取蒙襲爵蒙曰無功而祿是欺君也非分而顯是欺己也吾豈爲三品官陷不義屢檄辭益堅士大夫高其節

劉智子子謀居穿山家貧竭力養母客游常州於神祠見遺金俄有婦人泣至乃夫陷重辟鬻田求賂因禱神壬癸志稿

義行

二

而失者智反之婦願分其半以酬辭不受

王烝字文簞景泰間江南饑巡撫周忱勸民納粟備賑烝出米五百斛全活無算朝命賜冠帶辭不受子謹字廷慎嘗割肉以療母疾事兄廷節極恭州舉鄉飲賓瞿依京年十八讓貲於兄代父應徭役邑有大舉知州及鄉老必採其言傾身好善不辭勞費

劉傲字以則智孫父檄以資長鄉賦周忱理江南財稅思用幹略者令郭南白見檄等數人忱每寓鶴山書院檄等入見不通謁忱臥榻上與語如家人時檄老傲任父事邑有水旱災輒陳之官多見從人以困累告無不

振給者邑陳生故金州學正廷佩子投傲詩傲得句喜極贈米百石金山寺災僧求忱忱命爲齋會曰得劉檄至事集矣檄使傲往以數百石題疏眾皆視以勸傲知詩楊維禎高啟諸人遺集皆爲梓行

曹珣字季珩性誠篤自奉儉約常周里黨貧乏人多德之

馬瑤字德輝少孤先聘妻顧其家微父卒祖母議改聘瑤不肯旣娶生一子顧以疾亡瑤誓不再娶亦不納婢媵以醫自給有儒行孝友任郵不愆所有又立塾以訓里中子弟年七十餘卒周廣爲作義夫序

壬癸志稿

義行

三

曾彪本姓呂字希賈篤孝友好行義七浦塘遼闊橋費不貲彪慨然獨任並造南北支流二橋人德之號爲呂三橋知州表其閭曰最善之門舉鄉飲賓

周勉字元學好讀書多隱德置產恆三酬其值自署其門曰一田三價買六子百年耕欲置義田宅不果歿後子世在踵行之在見列傳

鄭餘慶字惟元時鄉俗多火葬餘慶於沙溪之陽買地數畝爲義塚以便窮民葬埋

張倫字廷序十試京兆當得明經以同學友貧且母老因讓焉性剛直面斥人過人敬憚之

凌昆字文紹幼多病棄舉子業學詩陸完延誨諸孫欲官之謝不受及完以黨錢甯被逮客皆散匿昆獨變姓名周旋艱險事定乃去卒祀鄉賢子汝志雲翼有傳六世孫士鏞字南聲性孝友制行治家悉稟小學家禮一時推重

陸望字武賢早失怙出贅不得侍母因號憶齋以見志婦翁無子撫族子爲後望躬任喪葬又爲所後子償逋賦生平重義好施能濟急難舉鄉飲賓

曹繩武字昭復隆慶四年舉人會試下第盡以行篋所有畀友朋之謁選及歸者里人願成忠卒於都爲治殮

壬癸志稿

義行

四

護櫬歸他人賻贈悉緘識還其家又爲葬其祖父同學周某歿教其子力學成名毛某妻守節爲建坊其好義類此

王夢周字伯栩錫爵從父萬厯十九年舉人選宜興教諭時學政圯甚夢周力爲振刷立思過簿嚴課諸生其貧者膳而教之士習丕變未踰年歿於任居鄉雪闕孝廉婦冤出族子守爵等九人於死獄人高其義

錢煖字叔弢桓子諸生性友愛敦睦宗族嘗置義田三百畝以贍族人卒祀鄉賢子陞字臣辰亦諸生兄給事中增歿撫其子廷欽如己子父歿遺券可萬金謂諸昆

弟曰我家所不足者非財也焚之族人貧不能葬倡爲  
廣孝阡瘞棺無數康熙十八九年邑大饑陞傾貲煮粥  
以賑獲全甚眾三十二年夏旱從知州步禱致疾卒年  
七十八祀鄉賢

王芳字尙義嘗訪友小直沽適慈谿費廷槐病臥旅舍  
芳爲具藥餌將護倍至明年與同舟還次呂城病卒目  
不瞑芳枕尸於股曰君有四弟兩兒親養有託母更戚  
戚費喉間書然有聲目漸瞑抵虎邱營棺衾以殮并訃  
其家逾月父始至載其棺返

穆雲桂字苑先性豪宕篤友誼明末張溥以復社名重  
壬癸志稿

義行

五

海內雲桂從之游黨禍熾同社生往往從決策多所挽  
救其後溥弟王治以給諫改官甫旋里踉蹌就逮禍不  
測雲桂先期北發傾身營護得削籍歸而雲桂幾爲忌  
者所中平生周旋故舊於患難死生之際獨盡心力三  
十年如一日

張起芳字伯榮世居常熟父文竹始遷太倉少好讀書  
家貧去而服賈值凶歲傾困以給貧族里有逋公賦者  
出貲濟之崇禎間兩舉鄉飲賓尤精於醫子世昌亦以  
醫聞

國朝

鄭遠甯字君翊宋少師居中後南渡徙居崑山父國鼎  
贅太倉因爲州人遠甯喜讀書補諸生從游者膳而教  
之不問其贄也晚年移居穿山與弟輔世隱居樂志自  
號逍遙散人輔世字德卿性耿介有所親無子病將歿  
指複壁中藏金以贈義不取告知應得者封識如初所  
居近白米涇淤塞出粟疏浚子元良婦徐氏俱以孝行  
稱

徐二階字羽虞憲卿子事父孝謹嘗闢家塾具膏火集  
親族之能文者肄業其中及赴省試則挈其子姓戚黨  
以行供其資斧 國朝順治八年以歲貢廷對高等又

壬癸志稿

義行

六

以薦試身言書判授永福知縣未任卒第三智舒俱諸  
生三智崇禎十四年大饑煮糜以食餓者順治二年地  
被兵積屍蔽野三智聚而掩之舒以奏銷呈誤再補諸  
生入貲爲淮安府訓導詩才茂贍爲時所稱

王天敘字惇五錫爵從孫自少知孝敬及長以爲善自  
勵里中舉高忠憲公同善會與兄君延割膏腴三十畝  
爲助已而罷不行歸其田則以他助不復取崇禎末海  
濱大亂人皆走匿天敘日抱父母棺涕泣不去兵至執  
見某帥帥義其爲人釋之嘗修小宗時祭禮以收恤其  
族待鄉里多厚德知州白登明濬劉河甚得其力工未

竣而天敘卒登明至哭之慟天敘能文而數奇年逾四十始與子聞炳同補諸生聞炳字蔚儀聰穎過人平生孝友誠慤一如其父

朱臣字來賓歲貢生爲人好義勇於任事任丹徒訓導修文廟勤於監督以勞瘁卒張玉書哭以詩曰十年正氣留吾黨二酉藏書啟後賢

王秉忠字廷蓋諸生性樸實敦善行嘗讀書僧寺拾遺金立寺門俟其人來還之有鬻女者知爲故家女秉忠典質以贖焉子星煜字聚東諸生以孝弟教家同居四十餘人咸遵其訓尤多幹濟如倡修海塘變通浮糧諸

王癸志稿

義行

七

議皆有規則卒年七十四

王潤字謹齋書法歐虞作小楷書孝經極爲沈起元所賞爲人謹厚睦宗黨憐孤獨以急告者咸濟之晚年尤力行善事捐貲營義塚葬及千餘棺

陸序字子和歲歉郡民大饑捐貲煮粥全活無算事聞以知縣議敘

阿午佚其姓王均家僮也均被海潮漂死午遍歷港汊三日夜得其屍葬之後均妻湯依母家父母逼改嫁自縊死事詳列女傳方湯之死獨午知之午奔走保全均幼女潮音潮音殤午痛哭極哀知主母棺在某家墓旁

欲昇歸與主人合葬未發湯氏聞之密令某家火婦棺以滅迹午乃詭稱湯使往視斂其骨以空罌易之負歸與潮音同瘞於均墓

楊楨字甯侯好讀書恥時俗干進究心樸學以鄉俗禮廢紛爭成習乃著書勸戒廣爲開諭人俱翕服適清查案起族人多逋賦楨命其子盡鬻田廬代償之雍正十年秋海溢楨登屋僅免零編殘帙爲外孫程穆衡所藏陸欽字順伯入貲授詹事府主簿年十六失怙奉母甚謹雍正十年海潮災偕里人設粥平糶全活甚多

楊洽字亮時諸生性純厚力行善事有徐某官山西旣

壬癸志稿

義行

八

卒妻子歸貧無依洽收養之撫其子成立人高其義壽九十五而終

金炳字繼萇諸生爲人練達崇儉樸有姑適人半載而寡迎養於家後爲之請旌建坊並撫養其嗣子卒年八十一

王斌字允兼立心行善見義必爲雍正十年秋海潮爲災道殣相望請於當道捐貲千計捨棺施藥置塚設倉遠近利賴乾隆二年督撫具題議敘縣丞選廣東新會後補浙江東陽旋告歸卒年七十四

何蘭字畹芳廩生爲詩文才氣橫溢應鄉試有同舟者



卒於京口爲治棺斂至金陵有戚疾病蘭醫治百方及卒斂而扶其柩以歸其敦氣誼類此

張文忠字季諤性儉約好行義乾隆十二年潮災牆屋圯米溼計百餘石家人欲賣之爲修造費文忠止之造土竈蒸爲飯招鄰里計口分給米盡繼以穀麥兩日中傾二百餘石後遷居沙溪屢值歲祲設粥捨棺至老不倦舉鄉飲賓辭不受卒年七十有八

金詩學字肄三人賞得知州銜戚屬徐某官臨晉知縣卒於任無子詩學助貲歸其喪會海潮災知州設粥平糶贊襄賑務全活甚眾卒年六十三

壬癸志稿

義行

九

邢德厚字坤元乾隆十六七年年米貴平糶數千餘石二十年歲大祲與其弟並糶數百石且捐錢助賑巡撫莊有恭以名聞議敘州判二十三年除授麻哈州判先是太倉築海塘知州屬董其事德厚陰助其費故工特堅固

胡錫鈺字大成由歛遷太倉家故貧以作苦積貲分田賙族黨乾隆十七年建婁東書院錫鈺捐金助之子鵬徵孫廷桂俱力行善事有祖父風

錢鳳孫字翼翔渭孫諸生喜藏書涉獵史傳具有卓識里中有義舉必審求實是爲之倡率當事輒就咨焉嘉

慶九年及道光三年兩遭水災鳳孫籌濟荒策至今德  
之爲人篤行誼重然諾宗黨咸奉爲規則舉鄉飲大賓  
卒年六十七子三寶瑛道光二年舉人亦以行誼稱鄉  
里喜任事雖傾身負累弗恤也任沛縣訓導歸里卒  
胡仲槐原名槐字右植諸生操行端慤遇喪紀悉用古  
禮性仁慈平生以澤物濟人爲職志先是邑有道難者  
土人因緣株累仲槐募資設局殮埋人多便之又先後  
呈請彙旌節孝至數百人舉鄉飲賓年七十一卒



壬癸志稿

義行

十